

Խ. Ա. ԹՈՐՈՒՅԱՆ

ԴԱՏԱՐԱՆԱՅԻՆ ՀԱՄԱԿԱՐԳԸ ՄԻՋՆԱԴԱՐՅԱՆ ՀԱՅԱՍՏԱՆՈՒՄ ԸՍՏ ՄԻԻԹԱՐ ԳՈՇԻ ԴԱՏԱՍՏԱՆԱԳՐՔԻ

Միջնադարյան Հայաստանի կամ Մխիթար Գոշի Դատաստանագրքում ներկայացված դատարանակազմությունն ու դատավարությունը հատուկ քննության առարկա են դարձրել հմուտ հայագետներ Վ. Բաստամյանցը, Հ. Կարստը, Խ. Սամուելյանը, Ն. Մելիք-Թանգյանը և Ա. Սուքիասյանը: Մի շարք անվանի հայագետներ էլ (Գարազաշյան, Ն. Աղոնց, Լ. Խաչիկյան) այս կամ այն առիթով անդրադարձնելով նշված հարցերին, արել են թեև հպանցիկ, բայց արժեքավոր դիտողություններ, Այդուհանդերձ հայկական միջնադարյան դատարանային համակարգի ամբողջական պատկերը ներկայացնելու առաջին և միակ փորձը պատկանում է Հ. Կարստին: Բազմազան և զանազան ժանրերով լի Սմբատ սպարապետի Դատաստանագրքի իր մեծարժեք հրատարակության ծանոթագրություններում, որոնք մի ստվար աստիճանով են կազմում, հայոց պատմությունը բաժանում է մի քանի շրջանի: Աղբյուրների բացակայության կամ սակավության պատճառով, նա Արշակունյաց հարստության ու պարսկա-արաբական տիրապետության շրջանների դատարանակազմության մասին մի քանի խոսք է ասում միայն: Հ. Կարստն ավելի հանգամանորեն կանգ է առնում հաջորդ պատմաշրջանի վրա, որը բաժանում է երեք մասի՝

ա) Բաղրատունյաց հարստություն.

բ) Դրան հաջորդող թագավորադուրկ շրջան կամ օտար տիրապետություն

գ) Կիլիկյան թագավորություն:

Մեզ հետաքրքրող երկրորդ շրջանի դատարանային համակարգը Հ. Կարստը ներկայացնում է հետևյալ ձևով (թարգմանաբար բերում ենք համապատասխան ամբողջ հատվածը):

«1. Կաթողիկոսի սինոդալ դատարան (Sinodalgericht des Katholikos)

2. Եպիսկոպոսական դատական ատյաններ՝

ա) եկեղեցական-կանոնական և

բ) աշխարհիկ դորժերի համար

3. Գավառային իշխանական և տանուտիրական դատարան. (Gaufurstliche und Schulzen-gerichte): Այս վերջին դատարանները, ըստ հավաստի փաստերի, տեղ-տեղ գոյություն ունեին տոպեկայական հյուսիսային և արևելյան առանձին շրջաններում, այնքանով, որքանով այդ շրջանների բնիկ տերերին նվաճողների կողմից դատական իրավասություն էր թողնվել: Տվյալ դատարանները, բնականաբար, դատավարությունը պետք է բաժանեին իրանց կողքին գոյություն ունեցող եպիսկոպոսական աշխարհիկ դատարանների հետ, որովհետև եպիսկոպոսական դատական իշխանությունն էր իրականացնում հսկողությունը դատարանների վրա: Այնուամենայնիվ պաշտոնական ու օրինական դատարանը միայն եպիսկոպոսական դատարանն է: Դատաստանագրքի նախադրության 6-րդ գլխում եպիսկոպոսն անվանված է առաջին դատավոր: Դատաստանագրքի առաջին մասի 96-րդ հոդվածը չգիտի այլ դատավոր, քան եպիսկոպոսները: «Դատավոր» հասկացությունը դրանով, պարզապես, նույնացվում է եպիսկոպոսի հետ¹: Դատարանային այս համակարգը Հ. Կարստն ուրվագծել է ըստ Մխիթարի Դատաստանագրքի: Սակայն պետք է նշել, որ միջնադարյան Հայաստանի դատարանների տեսակները, ըստ Դատաստանագրքի, շատ ավելի են, քան արձանագրել է Հ. Կարստը: Եթե նույնիսկ մտածենք, որ Հ. Կարստը ներկայացրել է միայն այն դատարանները, որոնք իրականում կային և գործում էին, ապա պետք է նշենք, որ նրա ուրվագծած համակարգը դարձյալ թերի է և չի ընդգրկում գործող բոլոր դատարանները:

Ն. Մելիք-Թանգյանը ուսումնասիրել է հատկապես հայկական եկեղեցական դատարանա-

¹ Sempadscher Kodex aus dem 13. Jahrhundert in Verbindung mit dem grossarmenischen Rechtsbuch des Mechithar Gosh, ediert und kommentiert von Josef Karst, zweiter Band, Kommentar, Strassburg, 1905, էջ 357: Ընդգծումը հեղինակինն է:

կազմությունը: Նա դրում է. «Հայոց եկեղեցու դատավարական կյանքը կարելի է բաժանել երեք մասի, ա) լուսավորչի տոհմի կաթողիկոսության ժամանակ, լուսավորչից մինչև Սահակ, բ) Մարզպանության ժամանակից մինչև հայոց թագավորության շնչումը, գ) Մահմեդական տիրապետության միջոց...

Այս շրջանում երեք դատական աստիճաններ կային. կաթողիկոսական՝ իր խորհրդակից եպիսկոպոսներով և շրջիկ հոգևորականներով, եպիսկոպոսական՝ սահմանված յուրաքանչյուր թեմի գործերի համար և քորեպիսկոպոսական՝ զավառակների եկեղեցական կառավարության և դատաստանի համար: Վարչական և դատաստանական բոլոր գործերը գտնվում էին այս երեք աստիճանի ատյաններում...

Բ) եկեղեցական դատարանի երկրորդ շրջանն ընկնում է Արշակունյաց լանկումից մինչև Ռուբինյանց անկումը... Այս շրջանում էլ երեք աստիճանով եկեղեցական դատավարությունը տիրապետող էր. ա) ամբողջ աշխարհի համար բարձրագույն և վերջին դատարան, բ) թեմական— թեմի համար և գ) քորեպիսկոպոսական—զավառի և համայնքների համար: Բարձրագույն ատյանը կազմում էր համագլխին եկեղեցական ժողովը կաթողիկոսի կամ նրա բացակայության միջոցին ավագագույն եպիսկոպոսի նախագահությամբ...

Գ) դատարանական երրորդ շրջանը կազմում է Ռուբինյանց անկումից հետո մինչև ռուսական տիրապետություն և տաճկահայոց մեջ մինչև 1860 թ. Սահմանադրությունը²:

Վ. Բաստամյանցը իր մեծարժեք «Յառաջաբանութեան» ալիսայլ էջերում³ խոսում է հոգևոր ատյաններից միայն եպիսկոպոսական դատարանի մասին. թվում է, դրանով էլ սպառված համարելով Դատաստանագրքում ներկայացված նման ատյանների շարքը, իսկ աշխարհական դատարանների մասին գրում է. «Բացի սորանից՝ Գոշը չէ կարգում հատուկ դատավորներ և դատարաններ աշխարհական գործերի համար, այլ դատավորական իրավասությունը թողնում է թագավորի և իշխանների ձեռքին»⁴:

Պրոֆ. Խ. Սամուելյանը Դատաստանագրքում արտահայտված դատարանային համակարգը ներկայացնելու հարցը սպառված է համարում վերաշարադրելով նախադրության Ե դիմի հայտնի հատվածը: «Մխիթար Գոշի Դատաստանագիրքը,— գրում է նա,— զանազանում է երկու տեսակ դատաստան՝ մարմնավոր, աշխարհական և հոգևոր, եկեղեցական: Առաջին դատաստանը գտնվում է թագավորի, իշխանների և ընդհանրապես աշխարհական վարչական անձանց իրավասության ներքո, իսկ երկրորդը—եպիսկոպոսների, վարդապետների և քահանաների»⁵:

Ահա այն ամենը, ինչ գտնում ենք մեր զրականության մեջ Մխիթար Գոշի Դատաստանագրքում արտահայտված դատարանային համակարգի վերաբերյալ: Հայագիտական ալիսայլ աշխատություններում կան ակնարկներ կամ առանձին դիտողություններ քննվող հարցի շուրջը, սակայն նրանցից մեծամասամբը ավելորդ են թվում, որովհետև դրանք նոր բան չեն ավելացնում և չեն անցնում վերը նշված սահմաններից:

Այժմ փորձենք ներկայացնել հայկական դատարանային համակարգի ամբողջական պատկերը ըստ Մխիթարի Դատաստանագրքի:

Սկզբից եկթ նշենք, որ դատարանի յուրաքանչյուր տեսակն հավաստող փաստերի քանակը շատ է, բայց տեղ չգրադեցնելու պատճառով կսահմանափակվենք ամեն ղեպքում երկու-երեք փաստ վկայակոչելով:

Մխիթարը գրում է. «Եւ արդ՝ մեզ այսպէս լիցի. ղի ի տեղւոջ յորում լիցի քրիստոնեայ թագաւոր կամ իշխան նոքա զաշխարհի դատաստանաս հոգայցեն ատենիւ եւ իրասմբքս⁶ կամ՝ «Այլ զթագաւորի կարգեալ իշխան թագաւորն աքսորեսցէ եւ խրատեսցէ»⁷: Համապատասխան պատիժներ սահմանելով զավանդանութեան, սպանութեան և տերունի զանձի գողութեան համար, Մխիթարն, այնուհետեւ, ավելացնում է. «Զայդոսիկ թագաւորն դատիցի»⁸: Ինչպես տեսնում ենք

2 Ն. Վ. Մելիք-Թաւադյան, Հայոց եկեղեցական իրավունքը, Բ գիրք, Շուշի, 1905, էջ 210—216:

3 Տե՛ս էջ 126, 132 և այլուր:

4 Մխիթարայ Գոշի Դատաստանագիրք հայոց, իրաւարանական հետազոտութիւնք հանդերձ ծանօթութեամբք, Վահան Ժ. վարդապետի Բաստամեանց, Վաղարշապատ, 1880 թ. Յառաջաբանութիւն, էջ 132, այսուհետեւ՝ Յառաջաբանութիւն:

5 Խաչիկ Սամուելյան, Մխիթար Գոշի Դատաստանագիրքն ու հին հայոց քաղաքացիական իրավունքը, Վիեննա, 1911, էջ 117: Ընդգծումները հեղինակինն են:

6 Դատաստանագիրք հայոց, էջ 26:

7 Նույն տեղում, էջ 422:

8 Նույն տեղում, էջ 311:

խոսքը թագավորական դատարանի մասին է: Այստեղ անհրաժեշտ է մի փոքրիկ բացատրություն: Այդ դատարանի մասին Մխիթարի խոսքը չպետք է տարօրինակ թվա, այն պատճառաբանությամբ, թե այդ ժամանակ Հայաստանում չկար ո՛չ թագավոր և ո՛չ էլ թագավորություն: Դիշտ է իրականում, կամ լավ է ասել, անվանապես, թագավոր չկար, բայց թե՛ բուն երկրում, և թե՛ Կիլիկիայում ներքին ու արտաքին իրադարձությունները զարգանում էին այն ուղղությամբ, որ կարող էին տանել դեպի թագավորական իշխանության վերականգնումը: Ինչպես հայտնի է Կիլիկիայում հայկական ազգային թագավորությունն, իրոք, ստեղծվեց, իսկ բուն երկրում Ջաբարյանները անկախ ինքնակալներ էին և եթե թագավոր չէին, ապա միայն անվանապես: Մխիթարի հեռատես ու խորաթափանց միտքը շոշափում է զալիքի ուրվապատկերը: Հայկական թագավորության վերականգնումը Մխիթարի ամենանվիրական երազն է, և նա ընդառաջում է ցանկալի ապագային, սահմանելով նաև թագավորական իշխանության իրավա-քաղաքական հիմունքները:

Այնուհետև, «Իշխանաց մի լիցի զսպանողսն սպանանել առանց հրամանի թագաւորաց, իսկ զդողսն խրատել իշխան լիցին»⁹, կամ՝ «Այլ խարդախիցն խրատ ըստ հրամանի իշխանացն լիցին»¹⁰, կամ՝ «Իսկ դահեկանահատիցն եւ դրամակոփիցն զձեռնսն հատանել հրամանաւ իշխանացն»¹¹, կամ՝ «Տեսանեմք զի այժմ ոմանք... իշխանաց զի աշառանօք եւ տգիտութեամբ թիրեն զուղիղ դատաստանն»¹²: Այս փաստերը հաստատում են, որ կար նաև իշխանի կամ իշխանական դատարան:

Անցնենք վկայությունների հաջորդ խմբին. «Զայդոսիկ թագաւորն դատիցի եւ զայլս եւս դատաստան հասարակաց ի դատաւորսն թողցէ»¹³, կամ՝ «Եւ կամ դատաւորք ճշգրիտ քննութեամբ ըստ հրամանի իշխանաց առնիցեն»¹⁴, կամ՝ «Արուեստաւորք ամենայն ըստ որում եւ իցեն արուեստի, եթէ հատուածով գործիցեն եւ եթէ վարձով, յորժամ ոչ ըստ հաճոյից տեսաւ գործիցեն, այլեւ զնիւթն ապականիցեն, դատաստանաւ է ըստ հաճոյից նոցա առնել դարձեալ, կա՛մ դապականալն ի գնոյն ըստ արժանւոյն լնուլ եւ ապա լիով հասանել վարձու: Ապա թէ ոչ՝ պականալ ի վարձէ ըստ արժանւոյն որպէս տեսանեն դատաւորք արասցեն»¹⁵: Ասել է թե, «Թողոր արհեստավորները, ինչ արհեստի էլ որ պատկանելիս լինեն և ինչպես էլ որ աշխատեն՝ հատվածով թե վարձով, թե կգործեն ոչ ըստ ցանկության պատվիրատուի, այլև նյութը կփչացնեն, պետք է պատվիրատուի ուղած ձևով նորից կատարեն աշխատանքը կամ փչացրածի գինը լրացնեն և նոր միայն ստանան իրենց վարձը լիովին: Ապա թե ոչ՝ դատավորներն իրենց հայեցողությամբ ըստ արժանվոյն պականցնեն վարձը»:

Թագավորական և իշխանական դատարաններից բացի, ուրեմն, կային նաև ստորին դատարաններ, որոնք քննում էին մանր գործեր, առավելապես քաղաքացիական բնույթի:

Վերը բերված քաղվածքները ցույց են տալիս, որ թագավորական դատարանին ենթակա էին այն գործերը, որոնք ընդգրկվում են *delicta publica* հասկացությամբ, և որոնք, ուրեմն, հանրային իրավական բնույթ ունեին: Այսպիսով, հասարակական անվտանգության ու հանրային անդորրի դեմ ստեղծող առավել վտանգավոր հանցագործությունները հետապնդվում են պետության կողմից ի դեմս թագավորի: Թեև դատավարությունն ընդհանուր առմամբ մրցակցական մեղադրական է, բայց նշված հանցագործությունները հետապնդվում են նաև *ex officio*, ի պաշտոնե: Այս փաստը հաստատում է, որ թագավորական դատարանը պետական դատարան է. այսինքն՝ իրեն ընդդատյա գործերով նրա իրավասությունը տարածվում է ամբողջ պետության վրա և պետության բոլոր քաղաքացիների վրա:

Իշխանական դատարանները շունեն մահվան դատապարտելու իրավունք: Այդ իրավունքը նրանց տալիս է թագավորը («Իշխանաց մի լիցի զսպանողսն սպանանել առանց հրամանի թագաւորաց»): Հետևապես հանրայնության դեմ ուղղված հանցագործությունների նկատմամբ իշխանների դատական իրավասությունը հիմնված է ոչ թե նրանց տոհմական-ժառանգական իրավունքների վրա, այլ թագավորի կողմից դատական իշխանության փոխանցման սկզբունքի վրա: Ուստի նշանակում է, որ տվյալ գործերով իշխանները որպես դատավորներ պետական-թագավորական պաշտոնյաներ են, ուստի նրանց դատարաններն էլ պետական դատարաններ: Նույնը վերա-

9 Դատաստանագիրք հայոց, էջ 311:

10 Նույն տեղում, էջ 435:

11 Նույն տեղում:

12 Նույն տեղում, էջ 12:

13 Նույն տեղում, էջ 311:

14 Նույն տեղում, էջ 436:

15 «Դատաստանագիրք հայոց», էջ 436:

րերում է նաև աշխարհական ստորին դատարաններին: Այս դատարանի դատավորները իրենց լիազորությունները ստանում են դատական իշխանության փոխանցման կարգով: Ստորին դատարանի դատավորները կամ հատուկ պաշտոնյաներն են՝ առավելագույնը քաղաքներում, կամ գյուղական տանուտերերն են, որոնք ղեկավարի պաշտոնը զուգակցում են դատավորի պաշտոնի հետ: Վերջին դեպքում այդ դատարանները կարելի է անվանել տանուտիրական:

Այսպիսով, թագավորական, իշխանական և ստորին դատարանները պետական դատարաններ են և սրանց ընդդատությունն են ենթակա համարյա բոլոր բրևական գործերը և քաղաքացիական գործերի մեծ մասը:

Դատաստանագիրքը ներկայացնում է աշխարհական դատարանների ուրիշ երկու տեսակ կու: Դիմենր փաստերին:

«Իսկ թագաւոր խրատել, եթէ այնպէս հարկ լիցի պահել զխաղաղութիւն, կամօք լիցի այլ թագաւորի ևւ հայրապետի...¹⁶ կամ՝ «Այլ իշխանաց իշխան-զիշխան խրատել ևւ կամ արքայի ևւ զազատ, թէ ի նոցունց կարգեալ իցէ—նոցունց միաբանութեամբ արասցէ, եւ թէ ի թագաւորէ՝ թագաւորին կամօք արասցէ»¹⁷: Սա ավատատիրության բուն ոգուն հատուկ, ավատատիրական-դասային դատարան է: Որոշ գործերով ավատատերերը դատվում էին կամ հավասար, կամ ավելի բարձր դասակիցների կողմից: Ավատատիրական դասային կամ հավասարների դատարանի գոյությունը հաստատվում է մի այլ հոդվածով ևս: Ահա այն. «Եւ եթէ աւելի քան զօրէնն անգթաբար հրամայիցէ գործել ևւ այնու վնաս մահու հասցէ ի տերանց ընդ հարկիւ անկելոց պարտապան լիցի արեան դատաստանի գերագունից տերանց»¹⁸: Ավատատիրոջն այս դեպքում դատում է ոչ թե պետական դատարանը, այլ ավելի բարձր դասակիցներից կազմված ավատատիրական-դասային դատարանը: Այնուհետև, «Ի տարեմուտս ըստ կարի ծառայեցէ եւ յաւուրս տօնից... Առանց դատաստանի մի տուգանեսցի, այլ ըստ կարի լիցի թէ յանցաւոր ի տէրունիսն դոցի, իսկ յայլս յանցաւոր գտեալ, դատաւորք վճարեսցի»¹⁹ կամ՝ «Տեսանեմք զի այժմ ոմանք... ի զխաւոր աշխարհականց... զի աշտանօք եւ... տգիտութեամբ թիրեւն զուղիղ դատաստանն»²⁰:

Այսպիսով, ավատատիրական դատարանները երկու տեսակի էին՝ դասային և տերունական: Ավատատիրական-դասային դատարանը հավասարների դատարանն է: Դա քննում է ավատատերի ներքին հարաբերություններից բխող գործեր, որոնք վերաբերում են, օրինակ՝ ազնվականների գահին ու բարձին, նրանց կողմից այս կամ այն պաշտոնը զբաղեցնելուն, ավատատիրական բարոյա-իրավական որոշ նորմեր խախտելուն և այլն:

Ավատատիրական-տերունական դատարանը, որ սովորաբար հանդես է գալիս ի դեմս ավատատիրոջ կամ նրա ներկայացուցչի, քննում է այն վեճերը, որոնք ծագում են մի կողմից ավատատիրոջ, և մյուս կողմից՝ նրա վասալների կամ շինականների միջև զուտ ավատատիրական հարաբերությունների հիման վրա, օրինակ՝ հարկ չվճարել, կամ պակաս վճարել, այս կամ այն պարտավորությունը չկատարել և այլն: Այս դատարանն իր բնույթը չի փոխում ըստ այնմ, թե ով է հանդես գալիս դատավորի դերում՝ աշխարհական ավատատերը (թագավոր, իշխան և այլն) թե հոգևոր ավատատերը՝ եկեղեցին որպես կալվածատեր:

Մինչև այժմ խոսքը աշխարհական դատարանների մասին էր, բայց Դատաստանագրքում լայնորեն ներկայացված են նաև հոգևոր-եկեղեցական դատարանները: Անցնենք այդ կարգի վկայություններին:

«Ձայստիկ ի հայրապետէ մերմէ լցցուք, զի նա է զլուխ դատաւորաց եկեղեցւոյ»²¹, կամ՝ «Տես եթէ որքան ստուգիւ հրամայէ դատել կաթողիկոսաց եւ ոչ պատիւ ի պատճառս ազահութեան ևւ թիրել զհշմարիտ դատաստանս»²², Թարգմանենք. «Տես թե որքան ստուգություն է պահանջում (կանոնը) կաթողիկոսների դատից-որոշումից ինչպես և պահանջում է չդալթակղվել ազահության պատճառով և շթիրել ճշմարիտ դատաստանը»: Ինչպես տեսնում ենք խոսքը կաթողիկոսական դատարանի մասին է: Այնուհետև, «Իսկ եկեղեցւոյ դատաստան եպիսկոպոսն հոգասցէ»²³, կամ՝ «Եւ զայս դատաստան դատել եպիսկոպոսաց... է»²⁴, կամ՝ «Այլ զի եպիս-

¹⁶ Նույն տեղում, էջ 422:

¹⁷ Նույն տեղում:

¹⁸ Նույն տեղում, էջ 330:

¹⁹ Նույն տեղում, էջ 316—317:

²⁰ Նույն տեղում, էջ 12:

²¹ Նույն տեղում, էջ 82:

²² Նույն տեղում, էջ 172:

²³ Նույն տեղում, էջ 26:

²⁴ Նույն տեղում, էջ 334:

կոպոսն, զի նա է առաջին դատաւորը²⁵։ Ակնհայտ է, որ պետք է արձանագրվի հոգևոր-եկեղեցական մի դատարան եւ. դա եպիսկոպոսական դատարանն է։

Բացի դրանից՝ «Արդ՝ թէպէտ յայտնի ըստ հարցմանն եւ պատասխանիդ, այլ վերակացուքն պարտապան են ապաշխարել ըստ դատելոյ վարդապետաց. եւ դատաւորաց ոչ է այդ»²⁶։ Կամ՝ «Ծաղագս այսմ դատաստանի լուայ եթէ վասն անձին չէ պարտ սպանանել, այլ յաղագս ընկերացն լաւ է սպանանել յորժամ աւաղակքն այլազգիք իցեն։ Եւ պաշտել զքահանայութիւնն կամ ոչ ի դիպումսն տեսցի ի վարդապետաց»²⁷, կամ «Ջայդոսիկ թաղաւորն դատիցի, եւ զայլս եւս դատաստան հասարակաց ի դատաւորսն թողցէ, եւ զանյայտսն զքնաւսն ի խոստովանութիւնս վարդապետացն»²⁸ կամ՝ «Իսկ զապաշխարութեանն յամենայն տեսցեն վարդապետք»²⁹ և այլն։ Այս վկայութիւնները, ինչպես և Դատաստանադրքում հղած մի շարք փաստեր ցույց են տալիս, սակայն, որ այսպես կոչված վարդապետական դատարանը առանձին ինքնուրույն օղակ չէր հոգևոր-եկեղեցական դատարանների շղթայում, ինչպես, օրինակ, եպիսկոպոսականը։ Վարդապետական դատարանը, ձիշտ կլինէր ասել վարդապետը որպէս դատավոր, ըստ լության չէր քննում դորժը կամ քննում էր այն չափով միայն, որքան անհրաժեշտ էր որոշելու համար ապաշխարութեան չափն ու ընդլայնել կամ զանցառու հոգևորականին նրա զբաղեցրած պաշտօնում թողնելու հարցը։ Բայց վարդապետները սովորաբար հրավիրվում էին մասնակցելու եպիսկոպոսական դատարանի աշխատանքներին։ Վարդապետները դատավորական իրավունքներ ունեին։ Հայկական իրավունքի պատմութեան մեջ, սակայն, նրանց դերն առավել մեծ է ու նշանակալից որպէս հմուտ օրենսգետ-օրենսմեկնիչներ և խորհրդատուներ իրավական հարցերում։ Մեծ է եղել վարդապետների դերը, մանավանդ, հայկական իրավունքի զարգացման գործում։ Երաւաստեղծման բնագավառում վարդապետները մեզանում խաղացել են նույն դերը, ինչ՝ իրավաբանները Հռոմում։

Վերջին խմբի վկայութիւնները, թէ, մեծանիցի այր ոք եւ ուստը ոչ իցէ նորս եւ ոչ դուստր, եւ ոչ այլ ոք ի ցեղէ հարց նորա, ժառանգութիւն նորա դատաւորաց լիցի թողակ... յնրիս քաժանեացի—հայրապետին եւ եպիսկոպոսին եւ քահանայից ժողովորդան»³⁰ կամ «Տեսանեմք զի այժմ ոմանք... ի քահանայից... զի աշառանօք... Եւ տղիտութեամբ թիւրեն զուղիղ դատաստանեմ»³¹ և այլն։ Այս վկայութիւնները, ինչպէս տեսնում ենք, վերաբերում են քահանայական դատարանին։

Այս բոլորից բացի կար հոգևոր-եկեղեցական դատարանի մի տեսակ եւ՝ եկեղեցական ժողովը, որ հրավիրվում էր դատական որոշակի նպատակներով, և որի մասին փաստերի վկայակոչումը, պարզապէս, ավելորդ ենք համարում։

Վերը շարադրվածը ի մի բերելով կստանանք Մխիթար Գոշի Դատաստանադրքում արտահայտված դատարանային հետևյալ համակարգը.

1. Պետական դատաւաններ
 - ա) թագավորական
 - բ) իշխանական
 - գ) ստորին
2. Ավատատիրական դատաւաններ
 - ա) դասային
 - բ) տերունական
3. Հոգևոր, եկեղեցական դատաւաններ
 - ա) դատաժողով
 - բ) կաթողիկոսական
 - գ) եպիսկոպոսական
 - դ) քահանայական

Սա ավատատիրական զարգացած հարաբերութիւնների շրջանին բնորոշ դատարանային համակարգ է։

Թող այն տպավորութիւնը չստեղծվի, թէ դատարանային այս համակարգը պատճենային

25 Նույն տեղում, էջ 31։

26 Նույն տեղում, էջ 175։

27 Նույն տեղում, էջ 179։

28 Նույն տեղում, էջ 311։

29 Նույն տեղում, էջ 349։

30 Նույն տեղում, էջ 83։

31 Նույն տեղում, էջ 12։

արագատույժամբ արտացոլում է Մխիթարի ժամանակ իրականում գոյություն ունեցած դատարանները: Այս համակարգում թվարկված դատարանների մեծագույն մասը իրականում, իրոք, կար և գործում էր: Բայց անհրաժեշտ է մի քանի խոսք ասել երկու դատարանների մասին, որոնցից մեկը թեև չկար իրականում, բայց արտահայտվել է Դատաստանագրքում, իսկ մյուսը, թեև կար իրականում, բայց չի արտահայտվել նրանում, որով ամբողջական տեսք կստանա թե՛ ինչնադարյան Հայաստանի բնվող ժամանակաշրջանի դատարանային համակարգը և թե՛ խոսքը դրա մասին: Այդ դատարաններից մեկը թագավորականն էր, իսկ մյուսը կոչվում էր «ատյան ձերոց»: Այս վերջին դատարանի մասին տեղեկությունների աղբյուրը դարձյալ Մխիթարն է և միայն Մխիթարը: Վերն արդեն ասացինք, թե ինչու է թագավորական դատարանը, որ չկար իրականում, արտացոլվել է Դատաստանագրքում և պետք է տեղ գտնի դատարանային համակարգում: Այժմ երկու խոսք ծերոց ատյանի մասին: Մեզ հայտնի միակ վկայությունն այդ մասին Մխիթարի առակներից մեկն է: Ահա այն. «Պղնձագործ և երկաթագործ ի խնամենալն արուեստի ձոխարանէին և ի լինել չակառակութեանն յատեան ևս երթային ձերոց: Եւ նոքա մեծագոյ ցուցին զերկաթագործ ասելով, թէ հասարակաց օգտակարն պատուկան է»³²: Այս դատարանը, ինչպես տեսնում ենք, նման չէ վերը թվարկված դատարաններին և ոչ մեկին թե՛ կառուցվածքով և թե՛ ընդդատյա գործերի ընույթով:

Վկայակոչված առակից, ինչպես և համբարությունների ավելի ուշ շրջանին վերաբերող աղբյուրներից հայտնի է, որ ձերոց ատյանը բնում էր միայն այն վեճերը, որոնք ծագում էին համբարությունների կամ համբարականների միջև և որոնք կապված էին բացառապես արհեստի անդամների հետ: Սերոց ատյանը համբարական հաստատություններից մեկն էր: Քաղաքացիական-իրավական և քրեա-իրավական ընդհանուր ու սովորական վեճերի կարգավորումը այդ ատյանի իրավասության սահմաններից դուրս էր գտնվում, ուստի, ինքը՝ դատարանն էլ դուրս է մնում դատարանային ընդհանուր համակարգից:

Գրականության մեջ այն տեսակետը կա, որ Մխիթարն, իբր, չի ընդունում վճռաբեկության իրավունքը և, հետևապես, վճռաբեկ ատյանը: Մերազնյա անվանի ուսումնասիրողներից մեկը գրում է. «Ինչպես հայերի, նույնպես և այն ժողովուրդների մեջ, որոնք կանգնած են իրավաբանական զարգացման ստոր աստիճանների վրա, գոյություն չունեն դատաստանի վճռի դեմ բողոք բարձրացնելու կամ վճիռը բեկանել տալու իրավունքը, բացակա էր *ius appellacionis*»³³: Այս տեսակետը հակասում է փաստերին, ուստի այն պետք է մերժվի: Բերենք այս կարգի բազմաթիվ փաստերից մեկը. «Յաղագս դատաստանաց դատաւորաց... Ի դատաստանէ դատաւորացս եւ կանոնական հրամանացս ուսաք մի շնորհս յաշտիճանսն լինել եւ եկեղեցւոյ զդատողութիւն. եւ եթէ արտաքոյ իրաւանց եւ աշտանօք վարիցի, անկցի յայնմ շնորհէ: Զի զոն դատաստանք եւ դատաւորաց ի վեհիցն քան զնոսա գիտողացն զիրաւունս օրինացն»³⁴: Շատ պարզ ու որոշակի է ասում Մխիթարը, որ կար թե՛ վճռաբեկության իրավունքը, և թե՛ վճռաբեկ ատյանը:

Առհասարակ պետք է նշել, որ ինչպես պետական, այնպես էլ հոգևոր-եկեղեցական դատարանների համակարգում վերընթաց գծով յուրաքանչյուր դատարան նախորդի համար միաժամանակ վերադաս ուրեմն և վճռաբեկ ատյան է: Այսպես, իշխանական դատարանը վճռաբեկ ատյան է ստորին դատարանի նկատմամբ, որովհետև, ընդհանրապես, «դատաւորք ճշգրիտ րենութեամբ ըստ հրամանի իշխանաց առնիցեն»³⁵: Իսկ իշխանական դատարանի նկատմամբ վերադաս ատյանը թագավորական դատարանն է: Նախ, այն պատճառով, որ իշխանը դատական իր իրավասությունը ստանում է թագավորից և որպես դատավոր թագավորական պաշտոնյա է, երկրորդ՝ դատական իշխանության բարձրագույն մարմինը թագավորն է:

Այնուհետև. քահանայական դատարանի համար վերադաս ատյանն է եպիսկոպոսական դատարանը, քանի որ թեմում եպիսկոպոսն է առաջին դատավորը: Վերջապես եպիսկոպոսական դատարանի նկատմամբ վերադաս ատյան է կաթողիկոսական դատարանը, որովհետև կաթողիկոսն է «զլուխ դատաւորաց եկեղեցւոյ»: Այսպիսով, եթե վճռաբեկության իրավունքը իրավաբանական զարգացման չափանիշ է համարվում, ապա մենք բոլոր հիմքերն ունենք ասելու, որ հայկական իրավունքն ու իրավախոհությունը զարգացման ամենաբարձր աստիճանների վրա էին գտնվում, որովհետև կար թե՛ այդ իրավունքը, և թե՛ այն իրագործող ատյանների համակարգը:

³² Մ խ ի Թ ա Ր Գ ո շ, Առակներ, բնագիրը ձեռագրերի համեմատությամբ և ներածությունը էմ. Պիվազյանի, Երևան, 1951, էջ 122:

³³ Խ. Ս ա մ ու ե լ յ ա ն, Արյան վրեժ և փրկանք, «Ազգագրական հանգես», գիրք 10, 1903, էջ 295:

³⁴ Մխիթարայ Գոշի Դատաստանագիրք հայոց, էջ 332:

Х. А. Торосян

СУДЕБНАЯ СИСТЕМА СРЕДНЕВЕКОВОЙ АРМЕНИИ ПО СУДЕБНИКУ МХИТАРА ГОША

Р е з ю м е

На основании данных Судебника впервые дается общая и полная картина судебной системы Армении в XII—XIII вв. В это время в Армении действовали следующие суды:

1. Государственные: царский, княжеский и низшие суды.
2. Феодалыные: сословный, господский.
3. Церковные: синодальный, суд католикоса, епископа, священника.

Как известно, в 1045 г. Армянское царство Багратидов пало, и в то время, когда Мхитар Гош писал свой Судебник, в Армении не было царя, но были реальные основания думать, что армянское царство будет восстановлено. В 1198 г. в Киликии было создано Армянское царство, поэтому в Судебнике был разработан также статус царского суда.

В статье показывается, что в Армении действовал *jus appellationis*.